

**ASUNTO: sobre órganos colegiados non previstos na Lei de Bases de Réxime Local e as asistencias deles percibidas**

Ó abeiro do establecido na lexislación vixente o Grupo político municipal Mixto a través do seu voceiro de Somos Cabanas - Participación Democrática Directa presenta a seguinte proposta para o seu debate no vindeiro Pleno ordinario da Corporación de marzo de 17:

**EXPOSICIÓN DE MOTIVOS**

O artigo 20 da Lei de Bases de Réxime Local (LBRL) establece como órganos colegiados das corporacións locais o Pleno, as comisións informativas e a Xunta de Goberno naqueles concellos de menos de 5000 habitantes que así o acorde o Pleno. Analizando o establecido na LBRL, Cabanas carece de regulamento orgánico para establecer en Pleno outros órganos colegiados, como son o caso da Xunta de Delegados ou a Xunta de Voceiros. Ademais, por mandato legal, todo órgano complementario sen regulamento da Corporación debe reflectir proporcionalmente a pluralidade da Corporación, as xuntas de delegados exclúen a representación legal da oposición. Consecuentemente, a Corporación de Cabanas en xullo de 2007, xullo de 2011 e xullo de 2015 aprobou unhas xuntas non previstas na lei que o Pleno debería revisar e axustar á normativa.

Por outra banda, a Xunta de Delegados custoulle en 2016 á veciñanza arredor de 30.000 euros, que se reparten entre os concelleiros do goberno que teñen dereito de asistencia ás xuntas. Este diñeiro non cotiza á seguridade social e só se grava a través do IRPF. Pero ademais estas xuntas non teñen funcións ningunhas, só serven para que o goberno do Partido Popular cobre sen declarar que ten salario. De feito, en total cada concelleiro ou concelleira do goberno sen dedicación pode percibir mensualmente 600 € só neste concepto, ao que hai que sumar a maiores a asignación a plenos, órganos externos, outras comisións, mesas de contratación e xuntas de voceiros.

No pleno de xullo de 2015 propuxen que non se cobrase por Xunta de Delegados, Xunta de Voceiros e órganos externos pola propia dificultade de aplicación do acordo plenario. Non obstante, esta proposta foi tumbada por quen hoxe debería render explicacións de a onde levan a Corporación. Evidentemente, aprobar uns órganos non regulados non é o mesmo que cobrar por eles. Deste xeito, a base de execución dos orzamentos afectados por esta anomalía establece claramente que "*O pago de indemnizacións e locomoción dos membros da Corporación por asistencia a reunións de órganos colegiados realizarase segundo as actas levantadas das mesmas*"; relacionado co artigo 75 da LBRL. Non obstante, e tal e como puidemos comprobar non existe ningún funcionario público que certifique a celebración das xuntas, porque así o acordou ilegalmente o Pleno da Corporación a proposta do alcalde. En 2011 foi o grupo popular en solitario quen impuxo os órganos colegiados e, coa súa maioría absoluta, sacou adiante as polémicas indemnizacións por asistencia. En 2015, ambos os acordos aprobáronos os votos a favor dos grupos popular e socialista.

É por todo isto que propoñemos regular estes órganos, aplicar o marco legal vixente e desenvolvedos a través dos mecanismos establecidos na lei. Por todo isto, o Pleno **ACORDA**

**Abrir expediente de revisión dos acordos sobre órganos colegiados e asistencias de xullo de 2015 e nomear instrutor ao secretario da Corporación.**

**Regular os órganos colegiados de acordo coa lei**

**Suprimir as asistencias a Xunta de Delegados, órganos externos e Xunta de Voceiros e modificar en consecuencia a base de execución correspondente do orzamento en vigor.**

**Instar a que se reintegren as asistencias a Xunta de Delegados, Xunta de Voceiros e órganos externos percibidas indebidamente desde o prazo legal de non prescrición.**

Cabanas, 13 de marzo de 2017

Xosé Manuel Pérez Sardiña

SR. ALCALDE DO CONCELLO DE CABANAS

